

BOSNA I HERCEGOVINA  
FEDERACIJA BOSNE I HERCEGOVINE  
VRHOVNI SUD  
FEDERACIJE BOSNE I HERCEGOVINE  
Broj: 43 0 I 193857 21 Spp  
Sarajevo, 31.5.2021. godine

Vrhovni sud Federacije Bosne i Hercegovine u Sarajevu, u izvršnom postupku tražitelja izvršenja Mirnesa Gadžun iz Zenice i izvršenika Rudnik mrkog uglja „Zenica“ d.o.o. Zenica, radi naplate doprinosa za penzijsko i invalidsko osiguranje, odlučujući o zahtjevu za rješavanje spornog pravnog pitanja Općinskog suda u Zenici broj 43 0 I 193857 21 I 17 I od 19.2.2021. godine, na osnovu odredbe člana 61d. stav (1) i člana 61e. stav (1) Zakona o parničnom postupku, na sjednici Građanskog odjeljenja održanoj 31.5.2021. godine donio je:

### O D L U K U

Obračun plaće uručen radniku po članu 80. stav 1. Zakona o radu predstavlja izvršnu ispravu za isplatu neto plaće i doprinosa za penzijsko i invalidsko osiguranje.

Isplata neto plaće u zakonskom roku ne podrazumijeva situaciju iz člana 80. stav 1. Zakona o radu, pa obračun plaće u tom slučaju nema svojstvo izvršne isprave i ne predstavlja izvršni naslov za uplatu obaveznih doprinosa.

### O b r a z l o ž e n j e

U Općinskom sudu u Zenici u toku je izvršni postupak po prijedlogu tražitelja izvršenja protiv izvršenika radi uplate doprinosa za penzijsko i invalidsko osiguranje, na osnovu obračuna plaće, kao izvršne isprave.

Općinski sud u Zenici je dana 19.2.2021. godine, po službenoj dužnosti, zahtjevom pokrenuo postupak pred Vrhovnim sudom Federacije radi rješavanja spornog pravnog pitanja. Uz zahtjev je dostavio predmet tog suda broj 43 0 I 193857 21 I.

Sporno pravno pitanje glasi: „da li se u izvršnom postupku prema obračunu plaće, koji se prema odredbi člana 80. stav 2. Zakona o radu smatra izvršnom ispravom, u vezi sa članom 23. stav 4. Zakona o izvršnom postupku, može tražiti isplata doprinosa za penzijsko i invalidsko osiguranje“.

U obrazloženju zahtjeva Općinski sud u Zenici navodi da je pred tim sudom trenutno pokrenut izvršni postupak u 117 predmeta prijedlogom za izvršenje na osnovu

obračuna plaće, kao izvršne isprave, kojim se potražuje uplata doprinosa za penzijsko i invalidsko osiguranje pljenidbom i prenosom novčanih sredstava sa transakcijskog računa izvršenika u korist tražitelja izvršenja na depozitni račun Budžeta Federacije BiH.

Činjenice relevantne za rješavanje spornog pravnog pitanja, po navodima Općinskog suda u Zenici su sljedeće: u dosadašnjoj praksi taj sud je određivao izvršenje na osnovu obračuna plaće, kao izvršne isprave u smislu odredbe člana 80. stav 2. Zakona o radu, radi isplate plaće. U postupcima koji su trenutno u toku, prijedlogom za izvršenje pokreće se pitanje izvršenja na dijelu obračuna plaće koji se odnosi na obračunate, a neuplaćene doprinose za penzijsko i invalidsko osiguranje (jer je neto plaća isplaćena), uz mišljenje da se prema obračunu plaće, kao izvršne isprave, može potraživati samo isplata plaće u izvršnom postupku, a ne i isplata doprinosa za penzijsko i invalidsko osiguranje. Taj sud cijeni da zakonsko rješenje da se obračun plaće smatra izvršnom ispravom, ustanovljeno je radi bržeg i efikasnijeg realizovanja prava zaposlenika – prava na isplatu plaće po mjesečnom obračunu, jer prema priloženom obračunu plaće, zaposleniku i pripada pravo na isplatu plaće, pošto iz navedenih zakonskih odredaba ne proizilazi da se obračun plaće odnosi na isplatu doprinosa iz penzijskog i invalidskog osiguranja.

Vrhovni sud Federacije BiH cijeni da je naznačeno sporno pravno pitanje od značaja za odlučivanje u većem broju predmeta u postupku pred prvostepenim sudom jer o istom još nije zauzeo pravno shvaćanje, a riječ je o pitanju o kojem se može očekivati različita praksa nižestepenih sudova.

Prema članu 79. stav 1. Zakona o radu<sup>1</sup> plaća se isplaćuje nakon obavljenog rada, u periodima isplate koji je mogu biti duži od 30 dana, a prema stavu 3. prilikom isplate plaće poslodavac je dužan radniku uručiti pisani obračun plaće.

Članom 80. stav 1. Zakona o radu propisano je da poslodavac koji ne isplati plaću u roku iz člana 79. stav 1. ovog zakona ili je ne isplati u cijelosti, dužan je do kraja mjeseca, u kojem je dospjela isplata plaće, radniku uručiti obračun plaće koju je bio dužan isplatiti. Stavom 2. propisano je da obračun iz stava 1. tog člana smatra se izvršnom ispravom.

Prema pravilu člana 22. Zakona o izvršnom postupku<sup>2</sup> sud određuje izvršenje samo na osnovu izvršne ili vjerodostojne isprave, osim ako tim zakonom nije drukčije određeno. Nema izvršenja bez valjanog pravnog osnova – izvršnog naslova.

Plaća se definiše kao propisani ili ugovoreni novčani iznos koji je poslodavac dužan isplatiti radniku za izvršeni odnosno obavljeni rad. Zakon o radu ne definiše sadržaj obračuna isplaćene plaće, odnosno sadržaj obračuna plaće koju je poslodavac radniku bio dužan isplatiti ako je na dan dospelosti nije isplatio. Međutim, odredbama Zakona o porezu na dohodak<sup>3</sup> (član 28. stav 2.), te Zakona o doprinosima<sup>4</sup> (član 11. stav

---

<sup>1</sup> Službene novine F BiH broj 26/16 i 89/18

<sup>2</sup> Službene novine F BiH broj 32/03, 52/03, 33/06, 39/06, 35/12 i 46/16

<sup>3</sup> Službene novine F BiH broj 67/08, 4/10, 86/10, 10/11, 53/11, 20/12, 27/13, 90/13 i 45/14

2.) propisane su obaveze poslodavca u vezi sa obračunom plaće i dostavljanjem potrebnih obrazaca poreznoj upravi. Tim odredbama propisano je da podaci o isplaćenim primanjima, utvrđenim osnovicama i obračunatim i obustavljenim iznosima obaveznih doprinosa i poreza moraju odgovarati podacima iskazanim u isplatnim listama koje je poslodavac dužan dostaviti radniku. Dostavljanje potrebnih obrazaca je obaveza poslodavca, te isti, između ostalog sadrže i podatke o plaćenim doprinosima na teret poslodavca. Doprinosi se plaćaju pri isplati plaće.

Dakle, obračun plaće, između ostalog, sadrži podatke o vrsti i iznosima obračunatih doprinosa iz plaće i obavezno se uručuju radniku.

S obzirom na obavezu poslodavca da prilikom isplate plaće uruči pisani obračun plaće radniku (član 79. stav 3. Zakona o radu), te njegove daljnje obaveze po Zakonu o porezu na dohodak (dostavljanje podataka o plaćenim doprinosima na teret poslodavca), te sadržaj obračuna plaće koji je isti i u slučaju isplate plaće po članu 79. Zakona o radu i neisplaćene plaće na dan dospelosti (član 80. Zakona o radu), obračun plaće sa obračunatom neto plaćom i obaveznim doprinosima predstavlja izvršnu ispravu kojom radnik može ostvariti svoja potraživanja (isplatu plaće i uplatu doprinosa) ako ih nije ostvario u roku propisanom u zakonu, dakle samo u situaciji kada su ispunjene pretpostavke iz člana 80. Zakona o radu.

Ukoliko je radniku isplaćena neto plaća u zakonskom roku, a poslodavac nije ispunio svoju obavezu dostavljanjem podataka poreznoj upravi o uplaćenim doprinosima, tada se ne radi o situaciji iz člana 80. Zakona o radu, te obračun plaće ne bi bio osnova, odnosno izvršni naslov za naplatu obaveznih doprinosa.

Zbog izloženog, odlučeno je kao u izreci.

Predsjednica Građanskog odjeljenja  
Slavica Čindrak,s.r.